

La\_Rochelle\_158.jpg

CLVIII.

sement grand & prompt sur vne origine basse & foible. Le sire de Ioinuille au commencement de l'Histoire de S. Louys, second Roi qui a possédé la Rochelle en propriété, en parle comme d'une ville deslors importante, & de consideration grande, pour son assiete & voisinage d'Angleterre. Mais cette richesse de la Nature estoit vaine, si elle n'eust esté estayée par la munificence des Rois, si les estrangers n'y eussent esté inuitez par privilèges, & les originaires accreus par gratifications, source de leurs richesses. Outre le lien de la naissance saint & religieux, les habitans de la Rochelle ont esté d'autant plus estroitement obligez à l'obeyssance, par la consideration des biensfaits, qui concilient & adoucissent les naturels plus rudes.

SIRE, Dieu vous a mis en main les moyens pour venger vostre dignité, & reduire sous l'obeyssance vos subiets esloignez. Comme Roy, la verge vous est donnée pour dompter & punir. Le chastiment exemplaire d'aucuns sera vne bride pour contenir les vns, & vne digue pour arrester les autres. Quels monstres & prodiges peuent egalier la temerité de ceux qui ont appelé les estrangers, ennemis de l'Estat, les ont inuitez aux depouilles de leur patrie, & à force ouverte ont porté leurs mains profanes dans les entrailles de leur mere commune, & les ont souillées de son sang?

Mais, SIRE, d'autre part, vous estes Pere: tout ce peuple que vous voyez soubmis à vostre sceptre, est vn deposit precieux commis à vostre soin, par celuy sous lequel toutes puissances




La\_Rochelle\_159.jpg

## CLIX.

ployent. Sous le respect du nom de Pere, titré d'affection & de pieté, les pointes de la plus aspre colere s'adoucissent. Vostre Majesté est vn chef-d'œuvre en nostre siecle, & vn exemple rare de toutes vertus : Mais de toutes, il n'y en a point qui vous rende tant recommandable que la clemence. Les particuliers sont capables de toutes vertus : Mais en la personne des Princes, la clemence rencontre vraiment son assiete : en eux elle reçoit son lustre, & exerce ses fonctions plus dignes. Je me souviens d'une parole de S. Chrysostome à l'Empereur Theodose : *Tu te plains d'avoir receu une iniure plus grande qu'aucun de tes devanciers ; mais si tu veux, Empereur tres-humain, tres-sage, & plein de pieté, cette iniure te donnera une couronne beaucoup plus riche que le Diademe que tu portes : car ce Diademe n'est autre chose que la marque de la vertu & de la liberalité de celui qui te l'a deferé : Mais cette couronne, tissue & composee d'humanité, sera due à ton seul merite & sagesse : & la posterité n'admirera pas tant l'ornement de ces pierres precieuses, qu'elle te loüera de la victoire que tu as emportée du mespris d'une iniure. Puis, Je te prie d'imiter le Seigneur, lequel iournellement offensé par nous, ne delaisse de nous departir ses graces & bienfaits.*

Et combien que l'autorité, vsurpée par ceux qui premiers ont soulevé la ville, soit grande, tenant comme asservie la liberté languissante & mourante : toutesfois ie me persuade que le peuple seduit par apparence, recognoissant la bonté de vostre Majesté, portée à la douceur, reclamera la liberté, remontera à sa source, brisera les chai-

La\_Rochelle\_160.jpg



**Image issue du site [mercurefrancois.ehess.fr](http://mercurefrancois.ehess.fr) - Cliché (c) Cécile Soudan**